

Date – 05/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Nimin Assembly sessiona pass tak The Mizoram State University Bill, 2025 hnuaiah State University thuthmun chu Aizawl pawna dah an duh thu MLA 2 in an sawi.
- 2. Horticulture Minister Prof. Lalnilawma'n Mizoram Anthurium festival chu tihtawp ni rih mahse a anthurium chingtute nen theihtawp an chhuah chho zel ang a ti.
- 3. President Draupadi Murmu chuan tun kum zabi chawhma lama ram changkanga India siam chu ramin a tum ber a nih thu a sawi
- 4. ICC Champions Trophy khelh mekah India chuan Australia wicket lia hnehin final an lut.

<><><>

STATE UNIVERSITY BILL

Nimin Assembly sessiona pass tak The Mizoram State University Bill, 2025 hnuaiah State University thuthmun chu Aizawl pawna dah an duh thu MLA 2 in an sawi.
He bill sawihonaah hian ZPM MLA H. Ginzalala chuan he bill hi a dodal lova chutih rual chuan a thuthmun tur Aizawl a ni chu a thlawp loh thu a sawi a, hmasawinna chuan Aizawl pawn te pawh thleng ve tawh se a duh thu sawiin, tunlai thiamna sang zawk leh ram changkang te tih angin hmasawinna chu rualkhai taka kalpui a duh tih a sawi a, Mizoram state university tih chu Mizoram University hming nen a inan em avangin Zo University ti-a phuah a rawt bawk a ni.

BJP MLA Dr K Beichhua pawhin Aizawl khawpui chu a tawt tawh em avangin Mizoram state university thuthmun chu Mizorama laili lai ber, Lunglei a sawn a rawt a ni.

Bill puluttu, Minister Dr.Vanlalhlana chuan NEP hnuaiah state university chu an duh vang ni lovin din a ngaih zawk avang leh zirlai zirna sang zawka seat chang lo zirlaiten zirna sang zawk an belh ve theihna turin state university chu din a tul tih a sawi a ni.

Sorkar hmasa khan kum 2023 August ni 16-a bill drafting committee an din a, hmun danga state university an kalpui dan te ngun taka an zirchian hnuah The Mizoram State University Bill chu kum 2024 December ni 22-a Council of Ministers thukhawm chuan Assembly Session hmasa bera pharh turin a pawm tih a sawi a. Ram pumah state university 481 a awm mek a, Mizoram leh Nagaland chu hmarchhak state zinga state university la nei ve lo awmchhun an ni tih a sawi a, kum 2035-ah chuan Mizoram university chu research university a nih tawh dawn avangin college nen a affiliate theih tawh dawn lova, chuvang chuan state sorkar leh private college te lo kuah khawma lo buaipui turin state university an mamawh dawn tih House a hrilh a ni.
He bill hian Mizoram State University chu state sorkar resource neih sa hmang tangkai tura duan a nih thu a sawi a, a hmingah Mizoram State Unversity tih tur a ni a, a thuthmun chu Aizawl niin, a thuneihna huamchin chu Mizoram pum a ni dawn a,
Chancellor atan Chief Minister a ni dawn a, Pro-chancellor-ah Higher and Technical Minister a ni dawn bawk a, state sorkar hnuaia college te chu university constituent college tih vek a ni dawn bawk a ni. He bill ina a tum ber chu zirlaite tan chhawrnaawm taka zirna chhawp chhuah a ni.

<><><>

ASSEMBLY-BUDGET

Finance changtu Chief Minister Pu Lalduhoma’n kum 2025-26 Financial Year-a Mizoram sum ruahman cheng vaibelchhe 15,198 leh nuai 76 chu nimin Assembly session-ah a pharh.
Kum kalta 2024-25 budget aiin kumin budget hi cheng vbc 786 nuai 64 in a tam zawk a, a punna hi za zela 5.4 a ni a, Budget Estimate 2024-25 zinga cheng vaibelchhe 13,835 leh nuai 42 chu house a pawm ngai a ni.
Pu Lalduhoma hian kumin Financial Year kal laia sum hman ruahman belhna Supplementary Demands for Grants 2024-2025 cheng vbc 3,512 leh nuai 33 chu a pharh nghal bawk a. Sorkar inrelbawlina senso, sorkar hnathawk hlawh leh pension bakah hmasawinna thawhna tur atana sum hman tur ruahman (revenue expenditure) hi cheng vbc 12,540 leh nuai 20 a ni a. Budget pumpui atanga chhutin za zela 82.51 a ni. Mipui hmasawinna atana sum ruahman (capital expenditure) atan cheng vaibelchhe 2658 leh nuai 55 dah a ni a, hei hi sum ruahman zawng zawng atanga chhutin za zela 17.4 a ni.
Chief Minister chuan sawrkar kum hmasa kum 2024 leh 2025 inkarah sum renchem, sum dinhmun in sawh nghehna kum an hman avangin nghawng tha tak tak a nei a ti a, India Sawrkar-in hmasawinna kawng atana a hmathlir, Viksit Bharat ti hlawhtling turin theihtawpin an inbuatsaih tih sawiin state in chhiah atanga sum a hmuh ang ang leiba rulh nan an hman a, sum leh pai enkawl kawngah harsatna tawk deuh mahse hma an sawn niin a sawi.

Chief Minister chuan Sawrkarin an dinhmun dik tak aia sang GSDP figure an nei thin chu tha anti lo a ti a, Tlahniam ta angin lan phah dawn mahse huaisen taka figure dik thei ang ber hmanga inteh a, nihna dik phochhuah an duh avangin kum 2024-25 GSDP Cheng Vbc 48037 leh nuai 52 chu Vbc 34003 leh nuai 27 ni zawk tura chhût chhuah a ni ta a, a hniamna Chu cheng Vbc 14034 leh nuai 25 ani tih sawiin figure dik zawk an hman tak avangin a inthlak tih a sawi.

Pu Lalduhoma chuan Mizoram economy than chhoh dan tarlangin sawrkar kum kal meka an thanna chu za zela 10.05 a ni a, sawrkar kum lo awm turah za zela 10.21 a thang tura beisei an ni tih sawiin Kum 2025-26 chhunga fiscal deficit chu Cheng Vbc 1651 leh nuai 68 ani dawn a ti a, hei hi GSDP atanga chhûtin zaa 4.57 a ni tih a sawi bawk.

(DESK)

<><><>

CCK-FLOWER SHOW

Horticulture Minister Prof. Lalnilawma'n Mizoram Anthurium festival chu tihtawp ni rih mahse a kaihhruai Horticulture Department leh anthurium chingtute chuan hrui khat vuanin theihtawp an chhuah chho zel ang a ti.

Horticulture Minister Prof. Lalnilawma hian nimin khan Aijal Club Park Main Gate-ah Ribbon chep chatin Chapchar Kut Flower Show hi a hawng a, Minister chuan theihtawp chhuahin Mizorama pangpar thar chhuah te chu ram pawna chhuak thei tura hmalak a tul tih a sawi a, tunhnai lawk pawhin Mizoram chuan Anthurium chu Singapore-ah an lo thawn chhuak chhin tawh tih a sawi a, Mizoram Anthurium festival chu tihtawp ni rih mahse theihtawp an chhuah chho zel ang hma an sawn zel a beisei tih a sawi a ni.

Kumin Chapchar kut flower show-a pangpar leh plants phochhuaktu, Mizoram Forist Association, Bonsai association of Mizoram, Orchid Society of Mizoram leh Zo Anthurium Grower Cooperative Society Mizoram te chu ram pawn atanga khualzin ten Mizoram mawina an rawn hmuh theihna turin theihtawpa tang ho zel turin a chah a, kumina Chapchar Kut thupui- Hawihhawmna chu pangpar hmanga lantir a awlsam ber dawna a hriat thu sawiin, Mizoram mipuite chu Chapchar Kut Flower show hi chhim vek turin a sawm a ni.

Chapchar kut flower show-ah hian Mizoram Florist Association chuan kumtluana par chi leh hun bik neia par chi- pangpar leh plants bakah pot leh leitha 400 atanga 500 vel an pho chhuak a, hei bakah hian pangpar chi hrang hrang khawi 40 chuang an pho chhuak bawk a, Anthurium Growers Cooperative Society (ZAGCS) chuan Anthurium chi 28 vel, chi hrang hranga an khawi an pho chhuak a, Bonsai Association of Mizoram chuan Bonsai pot 40 pho chhuakin, Orchid society of Mizoram te chuan pot 170 ah nauban chi hrang hrang 10 an pho chhuak a ni.

<><><>

REPEAL BILL

Nimina Mizoram Legislative Assembly thutkhawmah "The Mizoram Exhibition of Films on Television Screen through Video Cassette Players (Repeal) Bill, 2025" chu lungrual takin pawm a ni.

Bill puluttu, Minister Dr.Vanlalhlana chuan tunlaiah Video Cassette hmangin film te tihchhuah a nih tawh loh avang leh sorkar laipuiin dan tangkai tawh lo te chu a tam thei ang ber ti bo tura a tih angin, Act an neih sa ti bo turin, Mizoram Exhibition of Films on Television Screen through Video Cassette Players (Repeal) Bill chu pawmpui turin House member te a sawm a. He bill hi member ten an sawiho hnuah House chuan lungrual takin a pass ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

PRESIDENT

President Draupadi Murmu chuan tun kum zabi chawhma lama ram changkanga India siam chu ramin a tum ber a nih thu a sawi. Ni hnih awh Rashtrapati Bhavan-a Visitor's Conference kharnaah he thu hi sawiin President Murmu-i chuan ram hmathlir tihhlawhtlin nan hian a kaihhnawih hrang hrang zirna ina thawktu leh zirlai zawng mawh an phur tih sawiin hmalam pana khawvel zau zawk an thlir thiam a tul thu a sawi a ni.

<><><>

ICC

ICC Champions Trophy khelh mekah India chuan Australia wicket lia hnehin final an lut. Nimina Semifinal inkhelah Australia chuan vaw hmasain run 256 an siam a. India chuan over 48.1 ah chakna tura mamawh zat hi siam tlingin hnehna an chang a ni. India team tan Virat Kohli chuan run siam hnem berin ball 98 ah run 84 a siam a ni. Vawiin hian Semifinal match hnihna khelh leh tur a ni a. Lahore khawpuiah New Zealand leh South Africa te an intum ang.

(Newsonair)

<><><>